

29898

25

掌銓題稿

卷十四之十六  
裁革添補



掌銓題稿目錄

卷之十四

議革南京督糧都御史疏

議革廣東屯田僉事疏

議革廣東巡撫疏

議專任總部京糧官疏

議陝西添設憲職疏

議復督糧官疏

議廣西按察司改併道分疏

議復蘓松管糧叅政并水利僉事兼轄  
松疏

議設土官學校補教官疏

卷之十五

補制勅房官疏

議歲終考覈鴻臚寺屬官疏

議考察光祿寺屬官疏

議增正歷監生疏

卷之十六

議懲酷官播示中外疏

議處廣東兵備知府等官疏

議加河道都御史總理軍務并復曹濮兵

備疏

議責成州縣正官徵糧問刑及多選進士

疏

議重民牧疏

議裁革冗員等事疏

議處兵馬正官并革曲阜世職知縣管民

事疏

議處刑部司官寃律久任疏

議紀錄却賄三臣疏

掌銓題稿目錄第五冊

掌銓題稿卷之十四

議革南京督糧都御史疏

看得南京貴州道監察御史楊邦憲奏稱  
要將總督糧儲都御史議行裁革查照正  
統初年并嘉靖二十六年題

准事例南京糧儲仍令南京戶部侍郎帶管其  
巡倉御史亦照舊止設一員給與

勅印查催振飭仍將部運規條申明通曉各一  
節爲照南京戶部額設尚書一員專理留

都財賦侍郎一員佐理查得職事稍簡以  
之兼理江南各省一應糧儲亦自有餘乃  
又有總督都御史一員委爲多設旣經御  
史楊邦憲具奏前來又據該司查有前例  
相應議處合候

命下將新陞南京戶部右侍郎徐貢元帶管提  
督糧儲原給關防就彼留用仍咨該部請  
給

勅書令其欽遵行事其部運規條移咨戶部轉  
行通曉巡倉御史亦止設一員見任總督  
南京糧儲都御史海瑞依議裁革隆慶四  
年三月二十三日題二十五日奉

聖旨是

議革廣東屯田僉事疏

看得巡撫廣東地方兼贊理軍務都察院  
右副都御史熊汝達會同巡按廣東監察  
御史楊標題稱按察司額設清軍副使一  
員職務甚簡又設僉事一員專管屯田監

法俱駐劄省城似應併省南韶兵巡原設  
僉事近因劉穩以功陞副使職銜養病去  
訖後來者遂以副使推補似應復舊守巡  
等道各有原擬駐劄信地不時巡歷人心  
知警近年以來守巡等道皆擇便安而處  
俱久不駐劄信地又如巡海等道專駐省  
城經年不出巡歷恐耳目有所不及地方  
利弊孰憑興革乞將各官應併復者或就  
近改除應存留者仍責成任事各一節爲  
照廣東按察司原有額設清軍副使一員  
駐劄省城事務殊簡以之兼管屯塩亦自  
有餘乃又添有屯塩僉事一員專理其事  
委屬多設其南韶兵巡原係僉事自劉穩  
以功陞副使本部循習卽以副使許宗鑑  
銓補原非額銜通應議處及照守巡分管  
一方其察民隱覈吏治本屬專責自非常  
川巡歷地方利病豈能盡得其實近年守  
巡等官於分轄衝僻州縣非公事取道終

歲未嘗一行遂使不肖有司幸其耳目不  
親任意恣縱以致閭閻蕭條盜賊充斥實  
於政體有乖相應申飭恭候

命下將廣東按察司專理鹽法兼管屯田僉事  
鍾繼元裁革就彼聽候改用事務歸併清  
軍副使施堯臣管理仍咨該部請給

勅書令其欽遵行事南韶兵巡照舊仍除僉事  
其副使許宗鑑暫令在任俟遷轉之日其  
缺仍改前銜各守巡等道務依原分信地

駐劄遵照憲綱於所分轄州縣無論遠近  
衝僻俱要常川巡歷一應政務着實舉行  
如有仍前不行巡歷擇處便安坐廢職業  
者許撫按官指名叅

奏重治不得輕貸隆慶四年三月三十日題  
四月初二日奉

聖旨是

議革廣東巡撫疏

看得吏科都給事中光懋等巡按直隸等

處監察御史蘓士潤各題稱要將近設廣  
東巡撫裁革廣西巡撫暫令調度仍將總  
督閩廣巡撫改爲提督兩廣軍務兼理廣  
東巡撫事惠潮兩府仍宜復屬南贛兼管  
各一節除新設廣西巡撫待後事寧另行  
議擬其廣東巡撫旣經科道條議前來相  
應議處合候

命下將廣東巡撫裁革原任巡撫熊汝達行令  
速赴浙江到任管事原任浙江巡撫谷中  
虛不必候代其見任總督兩廣軍務兼理  
糧餉兵部左侍郎兼都察院右僉都御史  
李遷改爲提督兩廣軍務兼理糧餉兼巡  
撫廣東不必拘定駐劄但遇有盜地方便  
宜勦滅候事寧之日仍駐梧州移咨該部  
換給

勅書關防原降給者俱行

奏繳其惠潮二府軍民政務先因彼此推避  
故議專屬廣東以便責成已奉

欽依訖今未經彼中詳議難以懸斷姑仍照舊  
管轄以免前弊如此則兩廣之事體歸一  
而遠徼之地方有賴矣隆慶四年五月十  
一日題十三日奉

聖旨是廣東巡撫依擬裁革着李遷兼管換勅  
與他

議專任總部京糧官疏

看得巡撫河南等處地方都察院右僉都  
御史李邦珍題稱該省京糧道止因原無  
註選官員以故接管不常缺人廢事乞要  
於布政司年淺叅政叅議內註選一員以  
便責成一節爲照總部京糧關係

國家大計委宜專任責成旣經都御史具題  
前來相應議擬合候

命下將兩省京糧道專於叅議內註選一員冊  
內填註總部京糧字樣但河南叅議額設  
三員王宗舜係註選駐劄本省管理糧儲  
董文家部理新完邵夢麟尚未到任且二

官資俸已深俱難坐委查有湖廣左叅議  
吳兌綜理周密陞轉日淺合無調河南布  
政司左叅議本部給與文憑令其前來管  
理京糧事務待河南叅議有缺另行填註  
其山東京糧道卽將見任部糧左叅議馮  
謙註選管理自後註選官員在京陞者給  
與手本卽許在京到任管事在外陞者照  
例給憑本省到任之後卽星夜前來接管  
行事不得循舊各處叅謁騷擾地方其撫  
按官亦不得別項差委致悞大計違者聽  
部院及該科叅奏處治仍移咨戶部都察  
院轉行河南山東撫按并布政使司衙門  
一體欽遵施行隆慶四年七月初三日題  
初五日奉

聖旨是

議陝西添設憲職疏

看得總督陝西三邊軍務

史兼兵部左侍郎王之誥巡撫延綏等處

地方釐理軍務都察院右僉都御史何東序會題稱要於榆林東路添設憲職一員神木叅將移駐高家堡該堡守備移駐神木其各原領之兵照數兌換及東路通判早爲銓補各一節除叅將守備移駐兌兵事宜移咨兵部徑自議覆及通判已經銓補無容別議外爲照榆林東路添設憲職一員既經督撫官會題前來相應依擬合候

命下將神木堡添設副使或僉事一員管理榆林東路兵糧兼分巡建安高家栢林大栢油神木永興鎮羗孤山木瓜園清水黃甫川城堡倉場并葭州神木府谷吳堡四州縣其榆林道改爲管理榆林中路兵糧兼分巡雙山常樂鎮城保寧嚮水波羅魚河歸德鎮川等堡倉場并榆綏二衛綏德米脂清澗三州縣各整飭兵馬催督錢糧脩葺城堡稽查奸弊聽理詞訟叅將守備俱

聽該道監督防禦各道

勅書關防應給應換者移咨兵部照例題

請其衙門公署俸薪書吏門皂等項事宜悉聽  
督撫議處施行隆慶四年九月二十七日  
題二十九日奉

聖旨是

議復督糧官疏

看得巡撫山東等處地方兼督理營田都  
察院右僉都御史梁夢龍題稱乞復督糧  
叅政給以關防駐劄省城巡歷催餉稅糧  
不得營求別委其青州兵備副使潘允端  
資俸稍淺宜備超遷提學副使周鑑海道  
副使董世彥科第已深宜備擢用各一節  
除副使董世彥已陞潘允端等候用外爲  
照稅糧係

國家重計叅政乃督催專官唯在昔偷安省  
城似爲冗設而撫按喜徇時議率爾議裁  
今各道分理不便則議覆委非得已旣經

巡撫官具題前來相應議擬合候

命下將山東布政司復設左叅政一員專管督糧駐劄省城每歲夏秋巡歷各府州縣催餉稅糧不得營求別委遇缺卽行銓補仍咨該部照例請

勅并給關防其各道分管糧稅照舊歸併叅政管理施行隆慶五年三月初七日題初九日奉

聖旨是

議廣西按察司改併道分疏

看得兩廣提督撫按等官李遷等會題稱要將廣西驛傳道事務併入清軍道管理該道僉事改作古田兵備副使仍給

勅書關防以便經理五年之後將銜裁革各一節旣經督撫等官會題前來相應依擬合候

命下將廣西驛傳道僉事改爲古田兵備副使請給

勅書關防令其經畧五年果有成功破格超擢  
其該道併管等項事宜悉照所議施行及  
查見任僉事汪廷鈺資俸尚淺另候別用  
該設副使候本部另行推補隆慶五年三  
月二十日題二十二日奉

聖旨是

議復蘓松管糧叅政并水利僉事兼轄  
蘓松疏

該巡按浙江監察御史吳從憲題稱查得  
先年蘓松常鎮曾設管糧叅政一員浙江  
水利道僉事兼管蘓松各府近年以來管  
糧叅政以閑冗裁革而水利僉事亦以統  
屬不便專轄浙江是皆狃於一時之見今  
者政務繁多若不得此二臣兼之則耳目  
見聞或有所遺乞將蘓松常鎮四府管糧  
叅政照舊添設一應錢糧徵收兌運俱令  
催督依期完解浙江水利僉事改給

勅書兼轄蘓松等府其直隸文移禮部查照新

設徽饒兵備事體一例施行等因奉

聖旨該部知道欽此欽遵抄出送司查得嘉靖  
二十九年添設山東布政司右叅政一員  
駐劄蘓州府地方專一催督蘓松常鎮四  
府錢糧嘉靖三十三年十二月裁革又查  
得湖廣按察司副使蔡國熙整飭蘓松常  
鎮四府地方兵備兼管水利糧儲通查案  
呈到部爲照

國家財賦大半出於東南蘓松常鎮四府在  
東南中尤爲錢糧最多之處顧各省皆有  
督糧叅政叅議等官而此四府獨無所以  
徃徃拖欠不完至於三吳之水本與嘉興  
湖州等處相通乃浙江治其上流蘓松治  
其下流彼此勢不相顧亦屬未便旣經御  
史吳從憲具奏前來相應議處合候

命下將山東布政使司仍舊添註叅政一員專  
一管理蘓松常鎮四府錢糧浙江水利僉  
事兼轄蘓松等府水利見任副使蔡國熙

止管理兵備事務本部移咨該部各請換  
勅書令其欽遵行事其浙江水利僉事亦不許  
越境參謁直隸撫按妨廢職務庶事有專  
責而于

國計不無少補等因隆慶五年八月二十九  
日題九月初一日奉

聖旨是

議設土官學校補教官疏

看得四川鎮雄府應襲土知府隴清奏稱  
要於本府復設學校乞補教官一員降印  
前來導化夷民一節爲照該府僻居西南  
邊徼本屬蠻方乃能不安夷俗欲設學建  
官以興教化深得爲政首務旣經本官具  
奏前來相應題

請合候

命下將鎮雄府復設儒學本部銓選教授一員  
并移咨禮部鑄給印信令其欽遵行事其  
文廟齋堂廩餼等費悉照所奏自行成辦

施行隆慶五年六月初六日題初八日奉  
聖旨是

掌銓題稿卷之十四

掌銓題稿卷之十五

補制勅房官疏

該六學士李春芳等題稱

制勅房辦事中書舍人王墀陞任趙瑤守制  
冊籍各去訖所有本房一應文書乏官辦理  
乞

勅吏部選取文學頗通字畫端楷者二三員題  
請送房供事等因奉

聖旨是吏部知道欽此欽遵看得

制勅房官旣稱缺人要行銓補本部採訪得戶部浙江清吏司署員外郎事司務黎民表南京太僕寺寺丞歸有光俱文學頗通字畫端楷合先行改補其黎民表仍以原官歸有光改太僕寺寺丞各令在房辦事再照

制勅房辦事乃是掌故之官必須常川在房方能諳曉事務辦理公移若如近年旋補旋陞則閱歷不久事體生疎殊非擇人辦理之意合候

命下黎民表就令到任歸有光本部給憑令其到任各供事再容臣等轉行在京各衙門查取六品以下官員情願考選者呈部或有歷事及續到舉人願考者亦許赴部收候類考揀選數人銓補其各員務要常川在房辦事不許仍前出入無常反成捷徑

隆慶四年三月十八日題二十日奉

聖旨是

議歲終考覈鴻臚寺屬官疏

准禮部咨該鴻臚寺卿李際春等題稱本寺序班等官見任九十五員人數旣衆志行難齊其清慎自持克勤職業者固多而志其汗下不惜名節者間亦有之玉石不分槩論俸資盡行外補何以示勸合無嚴加考覈每歲終將賢否大著者開呈吏部禮儀閑熟職業無愧者留之久任上則選補隨堂次亦破格優處果係素行不脩者別行改用等因奉

聖旨禮部知道欽此欽遵咨部送司案呈到部爲照人非大賢必有所謂而後不敢爲惡其無所謂而爲善者則鮮矣是以勸懲賞罰之權雖唐虞三代亦所不廢然以行之科貢正途欲其自勵尚以爲難况以輸粟得官如今之序班者乎查得序班三年奏績例有考覈然必九年通考方行斥陟六年京察亦得與在京五品以下官通行斥

陟緣彼既以入貲出身未嘗學問不知法紀且員多人雜怠縱者實多以故賢否混淆玉石莫辨本部每值推陞之期無憑查覈惟循資俸而已其間向上者或托故以自全不肖者亦飾僞以求逸紛紛

請告更非政體合候

命下劄行該寺除考滿京察照例外每歲終堂上官卽將寺屬勤惰賢否註擬考語造冊送部以憑分別擢處施行等因隆慶四年

三月十三日題十五日奉

聖旨是

議考察光祿寺屬官疏

該巡視光祿寺陝西道監察御史張守約題稱光祿寺屬官舊例止於五年大計不才竟多漏網臣專理查刷見得各官畏法奉公者固有而怠緩優柔政務付之左右狡僞恣肆收支漫無清白甚至堂官未能約束進退任其規避者誠不終無所以倉

糧混貯少數不知何官管收簿籍開註糊塗莫究何官作弊支出止憑報數監放未免通同若不嚴加考核豈惟不肖得以文奸卽有勵志盡職者亦將何以自見合無比照五城兵馬事例每歲終許巡視查刷科道將廳署各官查訪賢否最著者會同舉劾以示勸懲其該寺掌印堂官亦許比照近日鴻臚寺題

請新例歲終甄別各屬賢否註考具揭開送吏部以憑斥陟再照該寺正官乃群僚表帥宜令久任俾之安位行志以風群僚資俸果深卽徑轉部堂不必外補凡一應清弊革奸恤民節用事宜得以悉心計處執法釐正等因題奉

聖旨該部知道欽此欽遵爲照該寺錢糧上供御用至爲繁多各廳署官賢否不一出納欠明委難寬縱但欲另議歲終考察則恐有不才之官平日放肆必待歲終而後處之是

縱也又恐歲終考察之時本無其人必至  
拘例搜求以充是苛也且巡視科道正係  
糾察之官若廳署官有貪肆實跡自得指  
名叅寃何待年終况巡視之差一年四易  
必待年終行之又恐在前者雖知而姑置  
勿論在後者纔至而未必真知亦爲未當  
合無考察仍照五年舊例今只行令巡視  
科道官逐日逐事悉心體訪如有怠緩優  
柔狡僞恣肆收支混淆開報糊塗等項情  
弊聽其卽時叅奏處治各屬官賢否許掌  
印堂官於歲終開送本部以憑處分至於  
久任正官責成果便不獨該寺當然容本  
部審時量才另行酌議等因隆慶四年七  
月初七日題初九日奉

聖旨是

議增正歷監生疏

該國子監祭酒馬自強等題稱本監舊規  
監生在班肄業滿者卽撥各衙門歷事近

因選取

恩貢數多有班滿三年之外未撥歷事壅滯苦  
難乞照前年事例添增正歷仍減在歷月  
日據所減名數以爲增歷之數暫行一二  
年仍復舊規等因奉

聖旨吏部知道欽此欽遵抄出送司查得嘉靖  
十五等年節該南京吏部題爲達下情以  
疏壅滯等事該本部查得節年事例議覆  
加增歷缺訖又查得正歷監生歷事一十  
二個月爲滿查呈到部爲照生徒旣多而  
歷缺有限則在監之壅滯未疏歷缺一增  
而滿期不減則在歷之疏通未便旣經該  
監議題前來又經該司查有前例相應題  
請合候

命下通行在京各衙門每該正歷三名者量增  
一名仍不拘已未撥出俱減三個月止歷  
九個月准滿卽以所減歷月之餘糧扣抵  
所增歷缺之正俸暫行二年仍復舊規其

考勤上選日期仍照舊例遵行等因隆慶  
五年三月三十日題四月初二日奉

聖旨是

掌銓題稿卷之十五

掌銓題藁卷之十六

議懲酷官播示中外疏

該禮科都給事中周詩叅論祥符縣知縣  
謝萬壽殘忍不職該省撫按官議擬姑息  
乞要盡法重懲仍將處治緣由播示中外  
等因奉

聖旨吏部知道欽此欽遵爲照謝萬壽酷暴事  
情已經本部題奉

欽依革職爲民無容別議今該科仍要播示中

外相應依擬合候

命下將謝萬壽題奉

欽依事情通行在內在外大小衙門知會自後  
務要心存仁恕政尚寬平上繹

祖宗設官之意而以固邦本爲良圖下體黎庶  
仰賴之心而以保赤子爲急務倘有苛刻  
殘民如萬壽者撫按官據實叅奏從重處  
治等因隆慶四年三月初七日題初九日  
奉

聖旨是

議處廣東兵備知府等官疏

該巡按廣東監察御史楊標題要選用兵  
備議立賞格知府功罪宜同兵備等因奉  
聖旨吏部知道欽此欽遵爲照近來推用邊海  
各兵備官本部不拘見任起廢京職外官  
俱皆遴選務在得人以稱任使其職務克  
舉歷俸一考撫按薦其賢者查例超擢如  
副使范大儒等撫按劾其否者卽行罷斥

如僉事黎元等其無撫按奏薦者本部止  
循資叙用一向遵行無容再議是則處兵  
備者然耳至若知府與兵備職任雖殊均  
有地方之責實則同功一體者如功罪  
賞罰漠不相關則上下之間視如秦越何  
以弭盜安民共成化理哉今據巡按御史  
楊標條議前來相應議擬合候

命下移咨都察院轉行各該撫按衙門今後各  
地方兵備官員歷俸年深賢能稱職者卽  
奏薦到部以憑查例超陞如歷俸僅一二  
年者仍不得一槩奏薦以市私恩否者卽  
行叅論以憑罷斥使人咸知賞不倖徼罰  
不倖免自當知所勸懲盡心職務其知府  
有功得與兵備併薦失事亦與併叅庶避  
事者絕巧免之私而戮力者獲同賞之勸  
等因隆慶四年三月初九日題十一日奉

聖旨是

議加河道都御史總理軍務并復曹濮

兵備疏

該兵科都給事中溫純等題稱各督撫兵備雖多得人而材質所限或有宜於彼而不宜於此者且內地多警凡策應保上之責卽與邊臣無異而廣東之勢尤急各兵備半屬書生宜速改調曹濮兵備裁革無名所宜復設濟寧當三省適中之地宜於河道都御史加以總理軍務職銜節制兵道則奸徒不軌之徒自可潛消等因奉

聖旨該部看了來說欽此欽遵抄出送司查得隆慶三年七月該山東撫按官姜廷願等會題裁革曹濮兵備庶務令分巡東兗道兼管已經本部覆奉

欽依通行去後今該前因爲照近年中原多盜而南北直隸河南山東接境之處爲尤甚以其四不相管出此入彼難於擒捕故也河道都御史駐劄濟寧旣與南北直隸河南相接而又皆其所屬若加以軍務之責

則便可以坐鎮其間聯屬渙散一遇盜起  
卽督率各省官兵協力會勦則自無所逃  
避誠爲得策其曹濮等處地方風俗獷悍  
川谷綿邈尤爲盜之淵藪必得人彈壓方  
爲穩妥所裁兵備委應照舊復設其兵備  
官員非獨廣東所當亟處至於各省亦當  
酌議若不絜短度長更移調置恐有才非  
所宜者必致誤事旣經都給事中溫純等  
具奏前來相應依擬合候

命下將總理河道加提督軍務職銜其各臨近  
地方南直隸則淮揚潁州徐州山東則曹  
濮臨清沂州河南則睢陳北直隸則大名  
天津各兵備聽其節制曹濮仍設兵備道  
其各項事務照前管轄東兗沂州各道亦  
各照前分管本務移咨該部俱換給

勅書關防其各省兵備聽本部查實應久任者  
久任應更置者亟行更置庶於事體爲當  
等因隆慶四年四月初六日題初八日奉

聖旨是

議責成州縣正官徵糧問刑及多選進

士疏

該刑科給事中陳三謨題稱州縣之事惟錢穀刑名爲最乞行撫按責成州縣正官時常在任專意及時催徵錢糧問理刑名及行九卿衙門查照科臣條議凡辦事進士務將律例定立課程熟讀講解考校甄別乞將二甲多選知州三甲多選知縣使惠澤一方三載之間果有政績顯著不次擢取或久任超遷等因奉

聖旨吏部知道欽此欽遵爲照守令於民最親而錢穀刑名乃其急務年來言官議禁虛文使得盡心職業不止一次其觀政進士講究律例卽上年亦曾言之俱經本部覆行但人情玩忽奉行未實以致成效未臻民不沾惠至於開選之時外多內少旣係舊制且合今日增額之意今該本官議題

前來相應題

請合候

命下咨行各部院等衙門及各撫按通行查照  
先令言官建議事理着實舉行凡一應州  
縣正官務要嚴禁迎送叅謁等項虛文及  
一應泛常差委令其專理民事如催徵必  
須及時親理不得過期逼迫使民無措其  
推委佐貳縱其漁獵者尤當嚴戢此在撫  
按官實心加意守令誰敢不遵若名雖禁  
約而心或不然致令逢迎如故者聽部院  
該科查實叅降至於觀政進士見今尚踵  
故套群居終日無所用心合行各衙門堂  
上官督令講律限定書程不時查考或摘  
條面訊以稽勤惰仍揀選知律吏書數人  
量進士多寡如五六人撥與一人俾與辯  
證解說務使律例通曉則日後聽斷檢驗  
等事自不眩於人言不泥於己見不必委  
托佐貳而用之有餘民可無冤矣其知律

人役待三年完日查係見役咨送本部照  
年月久近量題免辦免考如係書手聽隨  
宜犒賞以償其勞至於進士銓選本部每  
遇大選通查內外衙門緩急如主事中行  
評博推官等職量選數人其餘多選知州  
知縣使親民事俟其政成績著破格遷擢  
如翰林臺諫部寺等官量才揀授漸復  
先朝故事庶致用之才育之有素親民之官充  
之有人人爭奮發事臻實效而於

今日開額掄才之意可不孤矣等因隆慶五年  
四月三十日題五月初二日奉

聖旨是

議重民牧疏

該吏科給事中賈三近題稱乞要申明  
累朝聖諭於各州縣長吏毋偏重進士一遇有  
缺不得濫授雜流署印各等因奉

聖旨吏部知道欽此欽遵爲照我

國家舊有三途並用之條年來亦間行之但

係才賢則出身皆不必論豈特不當薄視鄉舉耶其州縣正官偶缺自當慎選署印之人乃監司等官徇情妄申撫按遂因批允以致衰鄙之輩橫肆貪殘深爲民害旣該給事中賈三近條議前來相應議擬合候

命下轉行各撫按等官今後於各州縣長吏無拘何項出身俱要一體相待果係卓異雖非甲科必與薦剡不得故遺如有貪肆雖係甲科亦列彈章毋容故縱本部照列以爲斥陟其撫按監司等官用心公私於此亦可考見至於朝

覲遷調及別有事故偶缺正官者各撫按官務要通訪所轄府佐志行高潔者不分遠邇通委署印信毋得專憑監司等官擬申槩批以滋民害庶人才有奮發之機而地方蒙安靜之福等因隆慶四年七月十九日題

聖旨是

議裁革冗員等事疏

該刑科都給事中舒化條陳裁革冗員須  
宜斟酌訪察賢否須要的確提問官司須  
得實跡本部轉行各撫按查照遵行等因  
奉

聖旨吏部知道欽此欽遵爲照我

國家法制詳明人臣自當遵守第年來議論  
太多奉行太過遂致紛更殊爲治道之累  
如汰冗員本求節費却乃務裁小官而大  
者仍議添設甚至旋裁旋復朝四暮三殊  
非事體至於撫按考察自有公平正大之  
規近乃多所假借泛聽群小苟憑揭帖暗  
據飛語妄指細過是非何由憑信本部所  
以丁寧于撫按方面等官而戒其失實者  
此也其外官有犯係五品以上者請

旨提問餘得徑自拿問爲其罪大而情真者也  
今浮言誤中遂被叅劾提問者往往有之

然勘者主於迎合雖知其寃莫爲辯理劾者意在怙終雖覺其誤不肯變更事理安得公平本部故嘗訪實駁正不准其詞或復與行勘務求諸實者此也今都給事中舒化復議及此相應議擬合候

命下轉行各撫按及方面等官查照節次覆議事理將所裁官員務要審處固不得專汰卑微以塞目前亦不得輕革緊要以滋後議至於考劾賢否當取資於本官公正上官相與平質以昭公道一切群小互訪及暗投揭帖等事俱應嚴禁其有貪酷不法踪跡顯著明例不宥者方許照例應拿問者拿問應叅提者叅提毋得誤聽致有誣枉如舉劾泛濫賢否顛倒者定行叅奏罪坐所由等因隆慶四年七月二十七日題二十九日奉

聖旨是

議處兵馬正官并革曲阜世職知縣管

民事疏

該廣西道監察御史趙可懷題稱今後掌印兵馬乞要正途選除及曲阜縣世職知縣止管林廟其該縣事務行令本府同知管理永爲定規因等奉

聖旨吏部知道欽此欽遵爲照兵馬司官職雖微然巡視各城譏察奸宄卽人命強盜皆由體勘所係甚重不得其人地方實受無窮之害若選用不慎禮待不加則又孰肯爲之曲阜知縣有城池民社之寄乃不擇賢能槩除世職亦不過假權以行私而民之受害世世不免尤屬未便御史趙可懷目擊其弊具奏前來深於地方有裨相應通行議擬合無今後兩京五城掌印兵馬俱將科目出身壯年有志行者陞除專一檢驗人命管理賊盜刑名其作揖圓風與各衙門瑣細之務皆是副指揮以下奔走掌印官不必行其在各衙門相遇之禮并

陞轉之格當與兩京知縣相同至於年終舉劾亦不必行蓋五城既各有御史臨之於上但有不職者便當糾劾何待年終其兩京各巡城御史差滿之日仍備造考語文冊封送部院以憑查考至於曲阜縣事宜註選兗州府清軍同知駐劄該縣管理其世職知縣止支俸給專管林廟該縣事務一毫不得干涉有缺則撫按官公舉一人起送赴部銓補似爲便益等因隆慶四

年九月初四日題初六日奉

聖旨是

議處刑部司官寃律久任疏

該刑科都給事中胡價等題稱法司莫重於刑曹刑官莫切於郎署若律意不精則判決豈當故欲平中外之獄在慎刑名之官欲慎刑曹之官在重刑官之任其司屬郎署等員果能精通刑名練達獄情心行端慎者俾之久任俟其年久卽擢相應京

堂或叅政副使以旌賢能等因奉

聖旨吏部知道欽此欽遵爲照刑乃民命所係而刑部則司刑之總也有堂官主於上有司屬分理於下居是職者使非律例精貫則比擬輕重必不能當其情然非久於其職則閱歷未深講究未熟欲其精貫亦不可得此久任之法不可以不行也然所謂久任者特爲公於聽斷而律法未熟者言耳乃近時刑部司官頗多不職有贖貨而鬻獄者有游意法外務在深文不求得情苛入以爲公者有審讞不平執拗自是堂官改之而不從大理駁之而不服每將稱寃犯人痛加箠楚立斃杖下遂使審大理而不敢出言者有巧肆支吾務爲推委一日之事動經數時一人之事動經數手苟有微嫌遂成永避頻年累歲不爲問結者有聽從囑託曲徇人情欲爲之出則罪雖大而強爲之辭欲爲之入則罪雖微而羅

織其獄者有法律不講苟應故事愒日玩時徒積俸以待遷者諸若此類習以成風恬不爲異遂使刑獄不清寃號無訢而覆盆之下天日終不能照若不痛加懲創則民將何恃以爲命也今都給事中胡價欲加甄別擇其人以久任誠爲有見相應題覆合候

命下本部移咨刑部責令司官將律例用心講究中間有練達老成用刑明慎者咨行本部悉令久任待其積有年勞推陞京堂及叅政副使等官以示優異其才有別長者亦開來另行改用其有踵襲前非不行悛改者卽行叅處貪酷者爲民推委者照罷軟例聽囑者照不謹例冠帶閑任執拘者照浮躁例苟應故事者照不及例降調外任如堂官隱護不舉聽該科一併叅究庶使賢者得以修職而可收久任之功不肖者無以自容而不爲久任之病刑罰清而

萬民服矣等因隆慶五年十二月十八日  
題二十日奉

聖旨是

議紀錄却賄三臣疏

該禮科給事中王璇題稱該巡視南城試  
監察御史周于德因派柴炭商人有本地  
方富戶于處賄託于德舊歇家曹雄投帖  
開具白米一百石欲求俸免本官隨即追  
問情由當將曹雄併雄妻弟秦守忠等捉  
拿到官搜出身邊銀一包連贓發兵馬司  
監候已經具題又該巡按山東監察御史  
張士佩因陞任例該舉劾有齊河縣知縣  
陳天策假遞公文內夾東帖呈具銀一百  
五十兩送至原籍以干保薦本官即將原  
來冊柬發按察司已經具題嚴究又該兩  
淮巡鹽監察御史李學詩有鹽商楊棟李  
祿開具禮帖銀一千兩送至學詩家當被  
伊弟令家人拿獲連贓送該府本官隨具

奏盡法問遣外爲照三臣職司風憲志向  
高潔事關名節乞

勅吏部登記俟各官考績陞遷之時分別優待  
以爲堅持清節者之勸仍移咨都察院轉  
行內外大小衙門各嚴加砥礪等因奉

聖旨吏部知道欽此欽遵爲照黷貨者小人之  
惡行却賄者君子之美節爲治之道必使  
小人不得肆其惡而君子得全其美斯爲  
當也乃近年以來是非不明議論顛倒行  
賄者既不加嚴受賄者亦不加察顧獨於  
却賄之人深求苛責或曰此必素以賄聞  
者不然此物奚宜至也或曰此必平日所  
受者多而故假此以掩之也或曰此乃有  
人知見不得已而爲之却也甚至有被指  
摘形之章奏者焉遂使受賄者泯於無迹  
而却賄者反爲有痕受賄者恬然以爲得  
計而却賄者皇然無以自容而行賄之人  
則公然爲之以爲如其受則得以濟事幸

也如其不受直不受而已而彼固不敢言  
吾固無恙也而又何畏乎是何使爲惡者  
幸而爲善者苦也夫君子惟知自信而小  
人則安能信君子之心古有却賄而名至  
今存者使非賄至又安得有却賄之名則  
所謂物奚宜至者非也彼素有貪聲者一  
旦却之是誠掩也若素非貪而今又却之  
則誠廉矣柰何不嘉其有據之廉而深探  
其無形之貪乎則所謂受賄而假此以掩  
者非也至於有人知見而却之者是亦却  
也非受也使無人知見安知其必受乎乃  
棄其廉於所可見而逆其貪於所不可知  
豈人情哉則所謂不得已而却之者亦非  
也而世俗之論顧如彼則非惟不足以訓  
廉而常使人畏首畏尾不能自主固有本  
欲爲廉而恐事露人議其後遂化爲貪者  
矣所以綱維世道者豈宜如是哉今御史  
周于德張士佩李學詩乃能於行賄之事

明言而不自隱藏行賄之人直指而不少  
假借可見其守法之正而不可干以私持  
身之清而不可免以利見理之明而不可  
惑以俗說本部卽當登記簿籍以俟優處  
爲廉謹之勸至於訓示諸司尤爲喫緊蓋  
俗說之浸淫旣久人心之蔽迷已深使非  
曉然以示則孰敢安然而爲合候

命下本部移咨都察院轉行內外大小衙門官  
員不止當知守廉之爲美凡遇有行賄之  
人卽當執拿在官明正其罪仍另行南京  
吏部並兩京都察院科道等官及各處撫  
按衙門一體知會以後凡遇有却賄之官  
便當記之善簿而不得反用爲癥痕列之  
薦剗而不得反指爲瑕類庶乎清濁有歸  
而激揚之理不忒是非有定而趨避之路  
不乖君子有所恃以爲善小人有所畏而  
不敢爲惡亦與治道之一機也等因隆慶  
六年二月初六日題初八日奉

聖旨是

掌銓題葉卷之十六終



